

宋史新編


中 北京帝紀

第二

八	漢書門
一	
六	
五	
冊架函號類	

八	漢書
二	
六	
二	
冊架函號類	

內閣文庫	
番號	漢 8829
冊數	65 (3)
函號	296 78





宋史新編目錄合卷二

卷四

仁宗


天聖九
康定一
嘉祐八

明道二
慶曆八

景祐四
皇祐五

寶元二
至和二

本紀四



卷五

英宗

治平四

神宗

熙寧十

元豐八

本紀五

卷六

哲宗

元祐八

紹聖四

元符三

本紀六

宋史新編目錄合卷二

興元年春二月戊午真宗崩帝卽位尊皇后爲皇太后
權處分軍國事己未大赦百官進秩一等優賞諸軍山
陵諸費毋賦于民庚申命宰臣丁謂爲山陵使乙丑以
生日爲乾元節丙寅進封元儼定王宰相丁謂馮拯樞
密使曹利用悉進秩戊辰貶寇準爲雷州司戶參軍李
迪爲衡州團練副使曹瑋爲左衛大將軍寇準竟卒貶
所三月庚寅初御崇德殿太后設幄次于承明殿垂簾
以見輔臣夏六月己酉命參知政事王曾按視山陵皇
堂庚申入內內侍省押班雷允恭坐擅移山陵皇堂伏
誅丁謂罷分司西京丙寅任中正罷知鄆州秋七月甲

子朔日食幾盡辛未以王曾爲中書侍郎同中書門下
平章事呂夷簡曾宗道參知政事丙子以錢惟演爲樞
密使辛卯貶丁謂爲崖州司戶參軍八月乙巳皇太后
同御承明殿垂簾聽政冬十月己酉葬真宗于永定陵
以天書徇十一月丁卯錢惟演罷知河陽乙亥以皇太
后生日正月八日爲長寧節辛巳開經筵命侍講孫奭
馮元講論語壬午以張知白爲樞密副使是歲遣使契
丹告哀及卽位契丹亦遣使來弔祭及賀卽位其賀生
辰及明年正旦自是亦歲交遣使如先朝故事交趾來
貢响斲囉立遵求內附蘇州水滄州海潮溢爲患振之

天聖元年春正月癸未命三司節浮費遂立計置司三月辛卯司天監上崇天曆夏四月丁巳詔近臣舉諫官御史各一人秋九月丙寅馮拯罷判河南府以王欽若爲門下侍郎同中書門下平章事冬十一月戊午置益州交子務是歲甘沙州來貢甘露降迄嘉祐甘露降凡十有七

二年夏五月丁亥朔日當食不食秋八月己卯幸國子監直講馬龜符等賜賚有差遂幸武成王廟冬十一月丁酉祀天地于圜丘大赦百官上尊號及皇太后尊號賜百官諸軍加等乙巳立郭氏爲皇后是歲龜茲甘肅

來貢

三年夏五月癸巳幸御莊觀割麥聞民舍機杼聲賜織婦茶帛己亥賜隱士林逋栗帛六月癸酉環原州屬羌叛寇邊都監趙士隆等死之冬十月辛酉以晏殊爲樞密副使十一月戊申同平章事王欽若卒十二月癸丑以張知白同中書門下平章事乙丑以張旻爲樞密使是歲龜茲甘州于闐來貢環慶蕃部嵬逋等內附襄州水晉絳陝解州饑並振之

四年夏五月壬午詔曰朕念生齒之蕃抵冒者衆法有高下情有輕重而有司巧避微文一切致之重辟豈稱

朕好生之志哉其令天下死罪情理可矜及刑名疑慮者具案以聞有司毋得舉駁己亥詔士有文而行不副者州郡毋得薦送閏月戊申減江淮歲漕米五十萬石除舒州太湖等九茶場民逋錢十三萬緡冬十月甲戌朔日有食之十二月丁亥帝白太后欲元日先上太后壽乃受朝太后不可宰臣王曾奏曰陛下以孝奉母儀太后以謙全國體請如太后令帝不從是歲郵延蕃部首領曹守貴等內附京師大雨水京東西淮南河北等路建劔邵武等州軍並水災振之

五年春正月壬寅朔初率百官上皇太后壽于會慶殿

遂御天安殿受朝己未晏殊罷為刑部侍郎戊辰以夏竦為樞密副使二月丙子詔振京東流民夏五月癸亥楚王元佐卒是月京畿旱六月甲戌祈雨丙子詔決畿內繫囚丁丑雨癸未罷諸營造之不急者秋七月振秦州水災塞滑州決河冬十一月丁酉朔以陝西旱蝗蠲民租癸巳祀天地于圜丘大赦是歲甘州交趾來貢六年春二月壬午同平章事張知白卒三月丙申朔日有食之是月以張士遜同中書門下平章事姜遵范雍並為樞密副使夏四月癸未命官減區司歲調上供物五月乙未朔交趾寇邊秋八月乙丑詔免河北水災州

軍秋稅乙亥河決澶州是歲甘州三佛齊來貢
七年春正月癸卯曹利用罷丙辰降利用爲左千牛衛
上將軍二月庚申朔參知政事魯宗道卒丙寅張士遜
罷知江寧府以呂夷簡同中書門下平章事丁卯以夏
竦薛奎並參知政事陳堯佐爲樞密副使癸酉貶曹利
用爲崇信軍節度房州安置未至自殺閏月壬子詔曰
朕開數路以詳延天下之士而制舉獨久不設意者吾
豪傑或以故見遺也其復置此科乃增其名爲六又增
高蹈立園沉淪草澤茂才異等科復置書判拔萃科及
試武舉三月辛巳詔振契丹流民分送唐鄧等州以閒

田處之夏四月辛卯交趾李公蘊子德政遣使告哀以
德政爲交趾郡王五月庚申詔戒文弊六月丁未大雷
雨玉清昭應宮災甲寅王曾罷知兗州秋七月癸亥以
玉清昭應宮災詔天下不復繕脩乙酉罷諸宮觀使八
月丁亥朔日有食之辛卯夏竦復爲樞密副使陳堯佐
王曙並參知政事冬十月丙午詔知州軍歲舉判司簿
尉可縣令者一人十一月癸亥冬至率百官上皇太后
壽乃受朝祕閣校理范仲淹先期上疏言天子奉親于
內自有家人禮不宜與百官同列而朝不報已而復疏
請皇太后還政亦不報仲淹出通判河中是歲河北水

遣使振恤察官吏貪暴不恤民者龜茲下溪州黔州蠻來貢八年夏五月甲寅賜信州道士張乾曜號澄素先生秋八月丙戌詔詳定鹽法九月乙丑樞密副使姜遵卒巳巳以趙稹爲樞密副使冬十一月戊辰祀天地于圜丘大赦是歲高麗占城邛部川都蠻來貢九年夏四月乙巳閏大樂六月庚辰翰林學士宋綬上皇太后儀制是月契丹主隆緒卒子宗真立秋七月丙午朔契丹使來告哀遣使吊祭及賀卽位遂爲故事冬十月詔公卿大夫勵名節翰林學士宋綬坐上書忤皇

太后出知應天府十一月丁酉出知雜御史曹脩古御史郭勸楊偕推直官段少連是歲龜茲沙州來貢女真晏端等百八十四人內附

明道元年春二月癸卯宰臣呂夷簡上三朝寶訓丙午詔仕廣南者毋過兩任以防貪黷庚戌復以張士遜同中書門下平章事丁卯宸妃李氏薨秋七月丁酉太白晝見彌月乃滅八月丙午以晏殊參知政事甲寅以楊崇勳爲樞密副使壬戌大內火延八殿乙丑求直言丁卯大赦冬十一月甲戌以脩內成大赦改元巳卯冬至率百官賀皇太后乃受朝壬辰延州言夏主趙德明卒

癸巳封德明子元昊為西平王十二月壬寅以楊崇勳為樞密使是歲京東淮南江東饑振之
 二年春二月戊戌彗見東北方乙巳以將有事籍田皇太后服袞衣儀天冠饗太廟皇太妃亞獻皇后終獻是日上皇太后尊號丁未躬耕籍田大赦百官上尊號三月庚午加恩百官甲午皇太后劉氏崩遺詔尊皇太妃為皇太后夏四月壬寅追尊母宸妃李氏為皇太后壬子帝親政裁抑僥倖中外大悅癸丑召還宋綬范仲淹已未罷呂夷簡判澶州張耆判許州夏竦知許州陳堯佐知永興軍范雍知荆南府趙稹知河中府晏殊知江

寧府以李迪同中書門下平章事王隨參知政事李諮為樞密副使王德用簽書樞密院事六月甲午朔日有食之秋七月戊子詔以旱蝗去尊號許中外直言闕政八月壬寅作奉慈廟冬十月癸巳朔太白犯南斗丁酉葬莊獻明肅劉皇后莊懿李皇后于永定陵戊午張士遜罷判河南府楊崇勳罷判許州以呂夷簡為門下侍郎同中書門下平章事王曙為樞密使宋綬參知政事王德用蔡齊並為樞密副使十一月癸亥朔太白犯南斗薛奎罷判都省甲戌贈寇準中書令十二月甲辰以京東饑出內藏絹二十萬代民歲輸乙卯廢皇后郭氏

御史中丞孔道輔率諫官范仲淹等大呼殿門請對丙辰出道輔仲淹仍詔臺諫自今毋相率請對丁巳詔改明年元是歲天下五路蝗四路饑振之注輦來貢景祐元年春正月甲戌詔執政大臣議兵農可更制者以聞甲申以淮南饑出內藏絹二十萬代歲輸二月戊申詔麟府州振蕃漢饑民三月壬午免諸路災傷州軍今年夏稅夏五月丁卯禁民間錦繡服飾西川歲貢錦亦罷之秋七月甲寅河決澶州八月壬戌有星孛于張翼癸亥樞密使王曙卒庚午以王曾為樞密使冬十一月己丑立曹氏為皇后是歲趙元昊反寇環慶交趾獻

馴象二詔還之

二年春正月癸丑置邇英延義二閣寫尚書無逸篇于屏二月戊辰李迪罷知亳州以王曾為門下侍郎同中書門下平章事王隨李諮並知樞密院事蔡齊盛度並參知政事王德用韓億並同知樞密院事三月戊申出內庫珠助三司經費自是歲如之夏四月庚午詔天下有知樂者所在薦聞五月甲午徭獠寇雷化州詔桂廣會兵討之秋九月壬寅按集賢校理李照等新樂己酉作睦親宅冬十一月戊子廢后郭氏薨乙未祀天地于園丘大赦錄五代及諸國後百官上尊號十二月詔長

更能導民脩水利闢荒田者賞之是歲育宗室子宗實于宮中

三年春正月壬辰追復郭氏為皇后丁酉葬郭皇后二月丙辰命官較鎮東推官阮逸布衣胡瑗等新樂三月戊戌詔曰致仕官舊皆給半俸而未嘗為顯官者或貧不能自給豈所以遇高年養廉恥也其大兩省大卿監正刺史閤門使已上致仕者自今給俸如分司例仍歲時賜羊酒米麪令所在長吏常加存問夏四月己酉朔日當食不食五月丙戌天章閣待制范仲淹坐譏刺大臣落職知饒州集賢校理余靖館閣校勘尹洙歐陽脩

竝落職補外詔戒百官越職言事秋八月乙卯月犯南斗九月癸巳熒惑犯南斗冬十一月戊寅保慶皇太后楊氏崩十二月丙寅樞密副使李諮卒丁卯以王德用知樞密院事章得象同知樞密院事是歲交趾西南蕃來貢南丹州蠻莫淮戟內附虔吉州水災振之四年春二月己酉葬莊惠楊皇后于永定陵夏四月甲子罷呂夷簡判許州王曾判鄆州宋綬為尚書左丞蔡齊為戶部侍郎以王隨為門下侍郎同中書門下平章事陳堯佐同中書門下平章事盛度知樞密院事韓億程琳石中立竝參知政事王巖同知樞密院事六月戊

子出神武祕略賜邊臣秋八月甲戌越州水賜被溺家
錢冬十二月并代沂州地大震壓者數萬家遣使存恤
是歲峭斯囉龜茲沙州來貢

寶元元年春正月戊戌朔日有食之三月戊戌朔罷王
隨判河陽陳堯佐判鄭州韓億為工部侍郎石中立為
戶部侍郎以張士遜為門下侍郎同中書門下平章事
章得象同中書門下平章事王巖李若谷並參知政事
王博文陳執中並同知樞密院事是月以安化蠻寇宜
融州發邵澧潭二州駐泊兵討之夏四月癸酉同知樞
密院王博文卒乙亥以張觀同知樞密院事六月己卯

建州大水賜被溺家錢八月庚辰熒惑犯南斗冬十月
丙寅詔戒百官朋黨十一月庚戌祀天地于圜丘大赦
改元百官上尊號十二月甲子京師地震己卯以趙元
昊反命知永興軍夏竦兼涇原秦鳳路安撫使知延州
范雍兼鄜延環慶路安撫使是歲交趾李德政進封南
平王黎州蠻來貢

二年春正月辛亥安化蠻平癸丑趙元昊表請稱帝改
元夏四月丁亥募民入粟實邊五月癸巳詔近臣舉方
略材武之士各二人壬子王德用罷為武寧軍節度使
以夏守贇知樞密院事六月壬戌詔省浮費自乘輿服

御及宮掖所須宜從簡約若吏兵祿賜毋槩行裁減壬午削趙元昊官爵除屬籍秋七月戊午夏竦移知涇州與范雍各加兼經略使馬步軍都總管冬十一月戊子朔出內庫珠估緡錢三十萬賜三司上諭輔臣曰此無用之物不若散之民收其直助糴邊儲亦可少紓吾民之斂也丁酉盛度罷知揚州程琳罷知潁州出御史中丞孔道輔壬寅以王巖知樞密院事宋庠參知政事是歲益梓夔利路饑出內帑振之曹濮單州蝗

康定元年春正月丙辰朔日有食之是月元昊寇延州執副都總管劉平石元孫二月丁亥以夏守贊爲陝西

都總管兼經略安撫使尋兼招討使辛卯月太白俱犯昴辛丑出內藏緡錢八十萬陝西市糴邊儲丙午改元許中外臣庶上封章言事癸丑范雍貶知安州是月以知制誥韓琦安撫陝西召知越州范仲淹知永興軍三月丙辰詔大臣條陝西攻守策丙子大風晝暝黑禳夕見東南丁丑罷大宴詔中外言闕政戊寅罷王巖知河南府陳執中知青州張觀知相州以晏殊宋綬知樞密院事王貽永同知樞密院事詔按察官舉才堪將帥者夏四月丙午鄜延路兵馬都監黃德和坐棄軍腰斬五月壬戌張士遜以太傅致仕以呂夷簡爲門下侍郎同

中書門下平章事戊寅以夏竦為陝西經略安撫招討使以韓琦范仲淹副之召夏守贊還是月元昊陷塞門安遠砦兵馬押監王繼元死之六月丁亥以夏守贊同知樞密院事秋七月乙丑遣使以討元昊告契丹八月戊申夏守贊罷判澶州以杜衍同知樞密院事是月以范仲淹兼知延州九月甲寅滑州河溢戊午李若谷罷提舉會靈觀以宋綬晁宗慤參知政事鄭戩同知樞密院事戊辰以晏殊為樞密使王貽永杜衍鄭戩並為樞密副使是月元昊寇三川砦都巡檢楊保吉死之連陷乾溝乾福趙福三堡環慶路馬步軍副都總管任福破

白豹城冬十二月癸未出內藏絹一百萬助糴軍儲癸卯參知政事宋綬卒戊申鑄當十錢權助邊費

慶曆元年春二月元昊寇渭州副總管任福大敗于好水川韓琦貶知秦州三月范仲淹貶知耀州夏四月甲申以陳執中同陝西安撫經略招討使五月辛未宋庠罷知揚州鄭戩罷知杭州以王舉正參知政事任中師任布為樞密副使六月乙巳詔近臣舉河北陝西河東知州通判縣令秋七月戊午月掩南斗是月元昊寇麟府州八月元昊寇金明砦破寧遠砦陷豐州兵馬押監王顯孫吉知州王餘慶死之冬十月罷夏竦判河中陳

執中知陝州詔罷都部署分陝西爲四路各置使以韓琦王沿范仲淹龐籍爲之十一月丙寅祀天地于圜丘大赦改元是歲湖南洞蠻知徽州首領來貢二年春正月丁巳復京師權鹽法癸亥詔磨勘院凡諸路提點刑獄到闕分功罪三等聞奏以待黜陟二月乙未詔河北強壯刺手背爲義勇軍三月甲辰詔武臣舉將才辛酉晁宗慤罷爲給事中己巳契丹遣蕭英劉六符來致書求割地夏四月庚辰知制誥富弼報使契丹五月戊午建大名府爲北京乙丑罷左藏月進錢千二百緡謂輔臣曰此周官所謂供王之好用者朕宮中無

所費其斥以賜縣官戊辰禁銷金爲服飾是月契丹集兵幽州聲言來侵河北京東皆爲邊備六月癸酉朔日有食之甲戌出內藏銀紬絹二百萬助邊費秋七月丙午任布罷知河陽府戊午大雨雹以呂夷簡兼判樞密院事章得象兼樞密使晏殊加同平章事癸亥富弼再使契丹定議增歲幣共五十萬九月丙午呂夷簡改兼樞密使乙丑契丹遣耶律仁起劉六符持誓書來閏月元昊寇定川峇涇原路馬步軍副都總管葛懷敏戰沒元昊大掠渭州而去冬十月丙辰知制誥梁適報使契丹丙寅契丹遣使再致誓書報徹兵十一月辛巳復置

陝西路經略安撫招討使命韓琦范仲淹龐籍分領之
甲申以泰山處士孫復爲國子監直講是歲占城來貢
三年春正月辛巳詔輔臣議蠲減天下賦役癸巳元昊
自名曩霄遣人納款稱夏國二月丙午賜陝西招討韓
琦范仲淹龐籍錢各百萬辛酉立四門學三月戊子呂
夷簡罷爲司徒以章得象晏殊並兼樞密使夏竦爲樞
密使賈昌朝參知政事夏四月戊戌朔幸瓊林苑閱騎
士癸卯遣使報曩霄許冊封及歲幣十萬匹茶三萬斤
甲辰以韓琦范仲淹爲樞密副使乙巳夏竦至京師罷
還本鎮以杜衍爲樞密使五月丁卯朔日有食之帝以

春夏不雨親禱于西太一宮是日雨秋七月丙子王舉
正罷知許州八月丁未以范仲淹參知政事富弼爲樞
密副使癸丑韓琦宣撫陝西九月丁卯召輔臣對天章
閣乙亥任中師罷知未興軍冬十月壬戌頒新定磨勘
式詔曰考課之法舊矣祥符之際治致升平凡下詔條
全務寬大考最則有限年之制入官則有循資之格及
此事邊因緣多故數披官簿審閱周行思得應務之才
無虧素餐之道非賞勸衆志不激勵非甄別人情不憤
悱具申凡目著于甲令詳見選舉志甲子築水洛城是
月光化軍亂討平之十一月丁亥詔曰周大司樂掌學

政以六藝教國子則官材蓋本於世胄而今之蔭法推
恩太廣以致踈宗蒙澤稚齒授官未知立身之道從政
之方而竝階仕進非所以審爵重民也其著為令使夫
冢嗣先錄以篤為後之體支子限年以明入官之重設
考課之格立保任之條古不云乎爵祿者天下之砥石
人君所以礪世而磨鈍咨爾庶位體茲意焉是月五星
皆在東方十二月丁巳大雨雪冰河北雨赤雪是歲
桂陽監徭蠻屢寇邊交趾安化蠻來貢

四年春正月乙亥荆王元儼卒辛卯太常禮院上新脩
禮書及慶曆祀儀二月丙申出奉宸庫銀三萬兩下陝

西博糴穀麥以濟饑民三月乙亥詔曰儒者通天地人
之理明古今治亂之原可謂博矣然學者不得騁其說
而有司務先聲病章句以拘牽之則吾豪雋奇偉之士
何以奮焉士以純明朴茂之美而無教學養成之法使
與不肖竝進則夫懿德敏行何以見焉此取士之甚敝
而學者自以為患夫遇人以薄者不可責其厚也今朕
建學興善以尊大夫之行更制革敝以盡學者之才有
司其務嚴訓導精察舉以稱朕意學者其進德脩業無
失其時其令州若縣皆立學本道使者選部屬官為教
授員不足取於鄉里宿學有道業者已卯出御書治道

三十五事賜講讀官夏五月壬申幸國子監賜直講孫復五品服遂幸武成王廟戊寅振淮南饑六月壬子范仲淹宣撫陝西河東秋七月戊寅大封宗室八月甲午富弼宣撫河北九月庚午晏殊罷知潁州甲申以杜衍同中書門下平章事兼樞密使賈昌朝爲樞密使陳執中參知政事冬十月庚寅以曩霄上表稱臣乞和賜誓詔歲賜銀絹茶絲凡二十五萬五千十一月戊午朔日當食不食己巳詔戒朋黨相訐及按察恣爲苛刻文人肆言行怪者壬午冬至祀天地于圜丘大赦十二月乙未封曩霄爲夏國主是歲宜州蠻歐希範叛發兵討之

桂陽蠻降黎州邛部川山前山後蠻首領來貢

五年春正月乙酉范仲淹罷知邠州富弼罷知鄆州丙戌杜衍罷知兗州以賈昌朝同中書門下平章事兼樞密使王貽永爲樞密使宋庠參知政事吳育罷竝爲樞密副使二月辛卯詔罷京朝官用保任敘遷法又罷蔭補限年法癸卯以久旱詔州縣毋得淹繫刑獄三月辛酉韓琦罷知揚州甲子宜州蠻賊歐希範平夏四月丁亥朔日有食之雲陰不見戊申章得象罷知陳州以陳執中同中書門下平章事兼樞密使庚戌以吳育參知政事丁度爲樞密副使冬十月庚辰罷宰臣兼樞密

使是歲曩霄初遣使來賀正旦及乾元節西南夷施州溪峒蠻來貢

六年春三月辛巳朔日有食之帝謂宰相賈昌朝曰人主懼天而脩德猶人臣畏法而自新昌朝頓首謝夏四月丙寅以久旱民多暵死命京城增鑿井四百秋八月癸酉以吳育為樞密副使丁度參知政事冬十月辛未湖南徭賊入寇詔發兵討之是歲交趾邈川首領喃廝囉西蕃瞎躡磨檀角安化州蠻蒙光速等來貢

七年春正月己亥頒慶曆編敕三月癸未詔天下有能言寬恤民力之事者有司驛置以聞癸巳以旱避殿減

膳水直言乙未賈昌朝罷判大名府吳育罷為給事中丁酉以夏竦為樞密使文彥博參知政事高若訥為樞密副使辛丑祈雨西太乙宮還遂雨夏五月己亥放天下通負冬十一月戊戌冬至祀天地于圜丘大赦貝州卒王則據城反語在明鎬傳是歲西蕃磨檀角來貢八年春正月丁丑文彥博宣撫河北明鎬副之閏月辛丑貝州平戊申以文彥博同中書門下平章事將士有功者遷擢有差辛酉親從官顏秀等四人夜入禁中謀為變伏誅二月癸酉夏國來告曩霄卒子諒祚立己卯賜瀛莫恩異州緡錢贖還饑民鬻子三月甲寅幸龍圖

天章閣詔輔臣曰西陲備禦兵冗賞濫罔知所從卿等各以所見條奏又詔翰林學士三司使知開封府御史中丞曰朕躬闕失左右朋邪中外險詐州郡暴虐法令有不便於民者朕欲聞之其悉以陳癸亥以朝政得失兵農要務邊防備豫將帥能否財賦利害錢法是非與夫讒人害政姦盜亂俗乃防微杜漸之策召知制誥諫官御史等諭之使悉對于篇夏四月己巳朔封諒祚爲夏國主壬申丁度罷判尚書都省以明鎬參知政事五月辛酉夏竦罷判河南府以宋庠爲樞密使龐籍參知政事六月丙子河決澶州商胡埽甲午參知政事明鎬

卒秋七月戊戌以河北水災令州縣募饑民爲軍冬十一月壬戌發廩振畿內貧民十二月乙丑朔以霖雨爲災頒德音改明年元赦天下出內藏錢帛賜三司賀粟以濟河北流民是歲合肥縣稻再實交趾來貢皇祐元年春正月甲午朔日有食之以水災罷上元燈樂二月丁卯彗出虛戊辰以河北疫遣使頒藥秋八月壬戌陳執中罷知陳州以宋庠同中書門下平章事龐籍爲樞密使高若訥參知政事梁適爲樞密副使九月乙巳廣源州蠻儂智高反寇邕州是歲大留國來貢二年春正月癸卯以歲饑罷上元觀燈三月詔曰祖宗

宋史紀事本末

親郊合祭天地祖宗並配百神從祀今祀明堂正當親郊之期而禮官所定祭天不及地祇配坐不及祖宗未合三朝之制且移郊為大饗蓋亦為民祈福宜合祭皇地祇奉太祖太宗真宗並配而五帝神州亦親獻之日月河海諸神悉如園丘從祀之數乃以秋九月辛亥行事大赦百官進秩一等自是明堂行慶為定制冬十一月己未詔后妃之家毋得除二府職任時太常薦太子中舍致仕胡瑗同阮逸等定鑄罇鐘特磬帝復命官詳定丁卯詔曰朕聞古者作樂本以薦上帝配祖考三五之盛不相襲沿然必太平始克明備周武受命至成王

時始大合樂漢初亦沿舊樂至武帝時始定泰一后土樂詩光武中興至明帝時始改大予之名唐高祖造邦至太宗時孝孫文收始定鐘律明皇方成唐樂是知經啓善述禮樂重事須三四世聲文乃定國初亦循用王朴竇儼所定周樂太祖患其聲高遂令和峴減一律真宗始議隨月轉律之法屢加按覈然念樂經久墜學者罕專歷古研覃亦未完緒頃雖博加訪求終未有知聲知經可信之人嘗為改更未適茲意中書門下其集兩制及太常禮樂官以天地五方神州日月宗廟社蜡祭享所用登歌宮縣審定聲律是非按古合今調諧中和

使經義可用以發揚祖宗之功德朕何憚改爲但審聲
驗書二學鮮竝互詆胷臆無所援據慨然希古靡忘于
懷是月出內藏緡錢四十萬紬絹六十萬下河北便糴
芻糧先是河北頻年水災朝廷蠲民稅幾盡至秋禾稼
將登而鎮定復大水竝邊尤被其害上憂軍儲不給故
有是舉是歲占城沙州西南蕃唃廝囉瞎氈來貢
三年春二月丙戌宰臣文彥博等進皇祐大饗明堂記
三月庚申宋庠罷知河南府以劉沆參知政事夏四月
癸未詔河北流民相屬吏不加恤乃飾廚傳交賂使客
以取名譽自今非犒設兵校其一切禁之五月乙亥班

簡要濟衆方于州縣六月丁亥知無爲軍茹孝標獻芝
草帝曰朕以豐年爲瑞賢臣爲寶草木虫魚之異奚足
尚哉姑免孝標罪戒州郡自今勿復獻秋七月丁巳兩
制禮官上大樂名曰大安冬十月庚子文彥博罷知許
州以龐籍同中書門下平章事高若訥爲樞密使梁適
參知政事王堯臣爲樞密副使十二月庚辰新作渾儀
是歲遣使安撫諸路饑民涇原樊家族密斯歌內附
四年夏五月儂智高圍廣州命知桂州陳曙率兵討之
六月丁亥以狄青爲樞密副使秋九月丁巳命余靖提
舉廣南兵甲經制盜賊事庚午以狄青宣撫荆湖路提

舉廣南經制盜賊事冬十月太白犯南斗十一月壬寅朔日有食之十二月壬申陳曙討智高敗績狄青斬曙以徇己丑雪初帝以愆亢責躬宰相龐籍等請避賢路帝曰朕誠不能感天心非卿等過也是夕乃得雪是歲廣東兵馬鈐轄張忠蔣偕廣西兵馬鈐轄王正倫知英州蘇緘俱爲智高所殺河北路及鄜州水振之五年春正月以廣南用兵罷上元張燈是月狄青大敗智高于邕州智高遁去二月癸未狄青復爲樞密副使夏四月甲午命劉沆梁適監議大樂五月乙巳高若訥罷判尚書都省以狄青爲樞密使丁未以孫沔爲樞密

副使秋七月乙巳詔曰比者湖北歲儉發常平以濟饑者如聞司農寺復督取豈朝廷振恤意哉其悉除之己酉詔薦舉非其人者御史臺彈奏見任監司以上弗許薦論閏月壬申龐籍罷知鄆州以陳執中梁適並同中書門下平章事九月乙酉御崇政殿觀新樂冬十月丙申朔日有食之十一月己巳祀天地于園立大赦戊子放天下逋負是冬禁轉運官進羨餘是歲占城來貢至和元年春正月壬申京城疫出珍劑療之癸酉貴妃張氏薨追冊爲后二月壬戌孫沔罷知杭州以田况爲樞密副使三月己巳王貽永罷爲景靈宮使以王德用

爲樞密使庚辰以太史言日當食四月朔下德音改元
夏四月甲午朔日有食之秋七月丁卯以程戡參知政
事戊辰梁適罷知秦州明日出御史馬遵呂景初吳中
復八月丙午以劉沆同中書門下平章事是歲融州大
立洞楊光朝內附

二年春三月丙子始封孔子後爲衍聖公夏四月己亥
契丹遣使求御容辛亥定差衙前法六月戊戌陳執中
罷判亳州以文彥博富弼並同中書門下平章事秋八
月己丑契丹主宗真卒子洪基立乙未置臺諫章奏簿
冬十二月丁亥修六塔河是歲蘇茂州蠻下溪州蠻各

入寇詔發兵討之龍賜州彭師黨以其族來歸封李德
政子日尊爲交趾郡王大食西蕃安化州蠻來貢
嘉祐元年春正月甲寅朔帝不豫辛酉輔臣禱祠于大
慶殿齋宿殿廡是月大雨雪木冰二月甲辰帝疾愈三
月辛未司天監言自至和元年五月客星出東方守天
關至是沒閏月癸未以王堯臣參知政事程戡爲樞密
副使夏四月壬子朔六塔河復決丙辰裁定補蔭選舉
法是月大雨水六月乙亥雨壞太社太稷壇詔羣臣實
封言時政闕失秋七月乙酉命京東西河北監司分行
水災州軍振饑蠲租己丑出內藏銀絹三十萬振貸河

北是月、彗出紫微垣、踰月乃滅、八月、庚戌朔、日有食之、
癸亥、狄青罷判陳州、以韓琦為樞密使、九月、辛卯、大赦、
改元、癸卯、行御史遷次格、冬、十一月、辛巳、王德用罷為
景靈宮使、以賈昌朝為樞密使、十二月、壬子、劉沆罷知
應天府、以曾公亮參知政事、是歲、融桂州蠻楊克端等
內附、占城、大食、西蕃來貢、
二年、春、三月、免黜落殿試舉人、悉賜第、夏、四月、丙寅、幽
州地大震、壓者數萬人、秋、七月、丁酉、詔緣邊經略安撫
使各舉文武官材堪將領者一人、八月、丁卯、置廣惠倉、
九月、庚子、契丹再使來求御容、冬、十月、乙巳、遣翰林學

士胡宿奉御容如契丹、十一月、戊申、置明經科、詔自今
間歲一貢舉、是歲、西南蕃、西蕃諸族來貢、

三年、夏、四月、丙辰、詔守令或貪恣、毫昏、以弛為寬、以苛
為察、以增賦斂為勞、以出入刑罰為能、而部使者莫之
舉劾、自今、其各思率職、毋撓權倖、毋縱有罪、以稱朕意、
六月、丙午、文彥博罷、判河南府、賈昌朝罷為景靈宮使、
以韓琦同中書門下平章事、宋庠、田况為樞密使、張昇
為樞密副使、秋、八月、己亥、朔、日有食之、己未、參知政事
王堯臣卒、是歲、夔州路旱、廣濟河溢、原武河決、害民田、
竝振之、安化州蠻來貢、下溪州蠻彭仕義率眾降、

四年春正月丙申朔日有食之二月己巳罷權茶詔曰
古者山澤之利與民共之故民足於下而君裕於上國
家無事刑罰以清自唐建中時始有茶禁上下規利垂
二百年如聞比來爲患益甚民被誅求之困日惟咨嗟
官受濫惡之入歲以陳積私藏盜販犯者寔繁嚴刑峻
誅情所不忍是於江湖間幅員數千里爲陷窅以害吾
民也朕心惻然念此久矣間遣使者往就問之而皆謹
然願弛其禁歲入之課以時上官一二近臣條析其狀
朕猶若憊然又於歲輸裁減其數使得饒阜以相爲生
俾通商利歷世之弊一旦以除著爲經常弗復更制損

上益下以休吾民尚慮喜於立異之人緣而爲姦之黨
妄陳奏議以惑官司必寘明刑無或有貸庚午廣南言
交趾寇欽州夏四月癸酉封柴氏後爲崇義公給田奉
周室祀詔曰先王推紹天之序尚尊賢之義褒其後嗣
賔以殊禮豈非聖人稽古報功之大典哉國家受命之
元繼周而王雖民靈欣戴曆數允集而虞賔將遜德義
不顯頃者推命本始褒及支庶每遇南郊許奏白身一
名充班行恩則厚矣而義未稱將上采姚姒之舊略循
周漢之典詳其世嫡優以公爵異其仕進之路申以土
田之錫俾廟寢有奉饗祀不輟庶幾乎春秋通三統厚

先代之制矣。冬十月癸酉，大禘于太廟，大赦。戊寅，加恩百官。是歲召河南處士邵雍不至，喞斯囉來貢。五年春正月辛卯朔，白虹貫日，太白犯歲星。三月乙未，歲星晝見。壬子，以蝗澇相仍，敕諸路振饑，仍察州縣不稱職者。夏四月癸未，程戡罷為羣牧制置使，以孫抃為樞密副使。五月丁酉，詔三司置寬恤民力司。己酉，召王安石入為三司度支判官。秋七月癸巳，邕州言交趾與甲峒蠻合兵寇邊，都巡檢宋士堯拒戰死之。詔發諸州兵討捕。戊戌，翰林學士歐陽脩上新唐書。庚戌，詔中書門下采端實之士，明進諸朝辨繳巧偽者，放黜之。冬十

一月辛丑，宋庠罷判鄭州，以曾公亮為樞密使，張昇、孫抃並參知政事。歐陽脩、陳升之、趙槩並為樞密副使。十二月己卯，蘇茂州蠻寇邕州。辛巳，諸州父老百歲以上者十二人，並補州助教。是歲大食來貢。

六年春三月己亥，同平章事富弼母喪去位。夏四月庚辰，陳升之罷，知定州。以包拯為樞密副使，出諫官唐介、趙抃、御史范師道、呂誨。六月壬子朔，日有食之。壬申，歲星晝見。丙子，以司馬光知諫院，入對。戊寅，以王安石知制誥。秋七月丙戌，詔振恤淮南江浙水災。癸巳，詔曰：臺諫為耳目之官，乃聽險陂之人，興造飛語，中傷善良，非

忠孝之行也。中書門下其申飭百工務敦實行循而弗改者絀之。八月戊寅詔曰朕觀古者治世牧民之吏多稱其職而百姓安其業今求材之路非不廣責善之法非不詳而吏多失職非稱所以爲民之意豈人才獨少而世變殊哉殆不得久於其官故也蓋智能材力之士雖有興利除害禁奸勸善之意非假以歲月則亦媮不爲用欲終厥功其路無由自今諸州縣守令有清白不擾政迹尤異而實惠及民者本路若州連書同罪保舉將政迹實狀以聞中書門下察訪得實許令再任。閏八月庚子以曾公亮同中書門下平章事張昇爲樞密使

歐陽脩參知政事胡宿爲樞密副使是歲冬無冰占城安化州蠻來貢

七年春正月乙亥詔南郊以太祖配爲定制三月乙卯孫卞罷爲羣牧制置使以趙槩參知政事吳奎爲樞密副使夏四月夏國主諒祚遣使來稱宣徽南院使詔戒之曰維乃祖考克有西土世爲漢藩輔今爾弗蹈于前烈迺竊署重爵以奉幣於朝方邊吏拒還乃復稽留境上不及廷見之期洎朕親覽貢函而僭我王命實如所聞朕疑風俗荒遠未達朝廷之儀雖然棄信慢常誼不可長其務思先世之約以保綏于斯民毋忽是圖以奸

我有邦之罰今後所差使人即不得僭擬五月戊午太白晝見庚午樞密副使包拯卒六月丙子朔歲星晝見秋七月戊申太白經天八月己卯詔以岳州防禦使宗實爲皇子賜名曙九月乙巳朔以皇子爲齊州防禦使進封鉅鹿郡公辛亥大饗明堂以真宗配帝大赦冬十月乙未太白晝見丙申詔內藏三司出緡錢百萬助糴天下常平倉是歲冬無冰占城來貢

八年春二月癸未帝不豫三月辛未帝崩在位四十二年五十四遺制皇子卽皇帝位山陵制度務從儉約九月英宗上尊謚曰神文聖武明孝皇帝廟號仁宗元

豐六年加今謚

論曰自漢以來稱守成令主必曰文景豈不以仁厚恭儉延重熙累洽之澤耶有宋仁宗果何媿矣帝在位四十二年宮室苑囿無所增飾燕私常服澣濯著令諸州旬上雨雪遇水旱則密禱禁庭或跣立殿下夜饑思膳燒羊戒勿宣泄大辟疑者皆上讞嘗謂輔臣曰朕未嘗晉人以死况敢濫用辟乎至於以忠厚待士夫以至誠待夷狄視累朝不加優哉乃若稽古右文表章學庸爲正學倡斯又文景所弗逮者獨惜關雎化缺不能復三代之治也噫

宋史新編卷四

Blank columns for text in the right-hand page.

宋史新編卷五

本紀五

英宗

明南京戶部主事莆田柯維騏編

英宗體乾膺曆隆功聖德憲文肅武睿神宣孝皇帝諱曙初太宗四子商王元份生濮安懿王允讓帝允讓第十三子也母仙遊縣君任氏明道元年正月三日生帝於宣平坊第赤光滿室四歲仁宗養於內寶元二年豫王生始歸濮邸性篤孝好讀書不為燕嬉服御儉素如儒者景祐三年賜名宗實累遷岳州團練使嘉祐六年十月居濮王喪起復秦州防禦使知宗正寺累疏懇辭

宋史新編卷五

終喪復授前命又辭七年八月復以為岳州團練使遂立為皇子改今名帝稱疾固辭凡十餘奏仁宗不允詔宗室安國公從吉等往諭旨帝不得已就召戒舍人曰謹守吾令上有適嗣吾歸矣九月遷齊州防禦使鉅鹿郡公八年三月仁宗崩夏四月壬申朔皇后傳遺詔命帝嗣位癸酉大赦百官進秩一等乙亥帝不豫丙子尊皇后曰皇太后己卯詔請皇太后同聽政庚子立高氏為皇后五月戊午以富弼為樞密使秋七月壬子初御紫宸殿見百官癸亥歲星晝見八月癸巳以生日為壽聖節九月辛亥子仲鍼進封淮陽郡王改名頊冬十月

甲午葬仁宗于永昭陵十二月己巳開經筵是歲于闐西南蕃來貢契丹遣使來弔祭及賀即位

治平元年夏四月癸未放宮女百三十五人五月戊申皇太后還政閏月戊辰輔臣進秩一等六月己亥子頊顯顯並進封有差壬戌歲星晝見秋八月丙辰貶內侍都知任守忠蘄州安置九月庚午詔夏國精擇使人戒勵無紊舊章冬十月戊申詔近臣監司舉治行素著可備升擢者二人十一月乙亥科陝西民刺以為義勇軍十二月戊子樞密副使吳奎父喪去位丙午以王疇為樞密副使是歲再雨土畿內及二十五州軍水振之西

蕃瞎斃子瞎欺丁木征內附契丹遣使賀壽聖節及明年正旦自是歲交遣使如故事

二年春三月己巳周琮上明天曆夏四月戊戌詔議崇奉濮安懿王典禮五月癸亥詔以綜核名實勵臣下以陳升之爲樞密副使六月己酉詔尚書省集議濮安懿王典禮甲寅罷集議令有司博求典故務在合經詔遣官與契丹定疆界秋七月癸亥富弼罷判揚州庚辰張昇罷判許州以文彥博爲樞密使呂公弼爲樞密副使是月詔減乘輿服御放宮女百八十人八月庚寅京師大雨水乙未詔曰蓋聞古之聖賢在位陰陽和風雨時

日月光星辰靜黎民阜蕃以底休平朕甚慕之朕猥以眇身託于王公之上夙夜以思惟懼不能以承先帝鴻業而比年以來水潦爲沴迺八月庚寅大雨京師室廬墊傷被溺者衆大田之稼害于有秋竊迹災變之來曾不虛發豈朕之不敏於德而不明於政與將天下刑獄滯冤賦絲煩苦民有愁歎亡聊之聲以奸其順氣歟不然則何天戒之甚也今飭躬焦思欲銷復大異而未聞在位者之忠言進祈自新厥路何絲焉應中外臣寮並許上實封言時政闕失及當世之利病可以佐元元者悉心以陳毋有所諱執政大臣皆朕之股肱其協德交

脩以輔朕之不逮九月壬午太白犯南斗冬十月乙巳
雨木冰十一月壬申有事南郊大赦是歲蔣波繡雲龍
賜等州來貢

三年春正月癸酉契丹改國號爲遼己卯溫州火丁丑
皇太后手詔下中書門下曰吾聞羣臣議請皇帝封崇
濮安懿王至今未見施行吾載閱前史乃知自有故事
濮安懿王譙國夫人王氏襄國夫人韓氏仙遊縣君任
氏皇帝可稱親濮安懿王稱皇王氏韓氏任氏並稱后
帝卽日下手詔曰稱親之禮謹遵慈訓追崇之典豈易
克當且欲以塋爲園卽園立廟俾王子孫主奉祠事壬

午御史呂誨范純仁呂大防坐議禮貶三月辛酉貶諫
官傅堯俞御史趙鼎趙瞻先是庚申堯見于室越數日
有孛于畢如月並逾兩月乃滅夏四月庚戌胡宿罷知
杭州以郭逵同簽書樞密院事五月戊辰帝謂宰相曰
朕欲與公等日論治道中書常務有定制者付有司行
之秋九月壬子朔日有食之是秋夏人攻大順城遣使
以違約詰責之冬十月丁亥詔禮部三歲一貢舉遂爲
定制甲午詔宰臣參知政事舉才行士可試館職者各
五人十一月戊午帝不豫十二月壬寅立頴王頊爲皇
太子癸卯大赦羣臣子爲父後者賜勳一轉

四年春正月庚戌朔羣臣上尊號丁巳帝崩在位五年年三十六帝之爲皇子也慎靜恭默天下陰知其有聖德及卽位命近臣以官而不名嘗語神宗曰舊制士大夫之子尚帝女皆升行以避舅姑之尊義甚無謂朕思此寤寐不平豈可以富貴之故屈人倫長幼之序也可詔有司革之會疾不果神宗述其事焉神宗卽位之六月上尊謚曰憲文肅武宣孝皇帝廟號英宗元豐六年加今謚

論曰每讀宋本紀言至於厚陵之享國弗永未嘗不掩卷太息曰嗟乎盛德主也夫吐珠於澤其誰不舍矧大

寶所屬固讓將終身雖舜禹受禪何以尚茲及踐位臨政必詢朝廷故事與古治所宜裁決常出羣臣意表其明睿又如此胡天不欲延嘉祐之澤俾弗克大有所爲也此與唐之順宗何異然順宗繼體中興而帝一傳遽衰宋業豈不尤可惜哉

神宗

神宗體元顯道法古立憲帝德王功英文烈武欽仁聖孝皇帝諱頊英宗長子也母曰宣仁聖烈皇后高氏慶曆八年四月十日生帝于濮王宮八月賜名仲鍼授率府副率遷至右千牛衛將軍嘉祐八年英宗卽位進安州

觀察使封光國公是年五月受經于東宮帝隆準龍顏動止皆有常度而天性好學日晏忘食每正衣冠拱手雖大暑未嘗用扇九月進忠武軍節度使同中書門下平章事淮陽郡王改今諱治平元年進封穎王三年十二月立爲皇太子四年正月丁巳英宗崩帝卽位戊午赦天下己未尊皇太后曰太皇太后皇后曰皇太后丙寅復以吳奎爲樞密副使戊辰宰臣韓琦曾公亮樞密使文彥博參知政事歐陽脩趙槩暨判揚州富弼等進秩有差進封弟顥昌王頽樂安郡王二月乙酉立向氏爲皇后戊子進封李日尊爲南平王庚寅以生日爲同

天節二月壬申歐陽脩罷知亳州癸酉以吳奎參知政事閏月甲申夏國主諒祚遣使獻方物謝罪因賜詔曰朕以夏國累年以來數興兵甲侵犯邊陲驚擾人民誘迫熟戶去秋乃復直叩大順圍迫城寨焚燒村落抗敵官軍邊奏屢聞人情共憤羣臣皆謂夏國已違誓詔請行拒絕先皇帝務存含恕且詰端由庶觀逆順之情以決衆多之論逮此遜章之稟命已悲仙馭之上賓朕纂極云初包荒在念仰循先志俯諒乃誠旣自省於前辜復願堅於永好苟奏封所敘忠信無渝則恩禮所加歲時如舊安民保福不亦休哉乙巳詔曰歲比不登今春

時雨農民桑蠶穀麥衆作勤勞一歲之功併在此時其
委安撫轉運司飭戒州縣吏省事息民無奪其時夏四
月丙寅御史中丞王陶侍御史吳申呂景以過毀大臣
黜罰壬申出諸州貢物名件手詔曰四方入貢雖云古
禮考之禹制未有若茲之繁也又所貢物多飲食之類
缺亦無害自今其悉罷之六月己未振河北流民秋八
月癸酉葬英宗于永厚陵九月壬午祧僖祖辛卯徙封
弟顥岐王頽高密郡王富弼爲尚書左僕射戊戌以王
安石爲翰林學士辛丑韓琦罷判相州吳奎罷知青州
陳升之罷知越州以呂公弼爲樞密使張方平趙抃竝

參知政事韓絳邵亢竝爲樞密副使冬十月丁未富弼
罷判河陽己酉開經筵參知政事張方平父喪去位癸
丑詔翰林學士及御史中丞各舉材堪御史者二人甲
寅製資治通鑑序賜司馬光癸酉知青澗城种諤取綏
州十一月丁丑詔近臣各舉才行可任使者一人戊寅
詔求直言十二月丙寅詔州縣吏竝緣爲姦致獄多瘕
死歲終會其數論罪著爲令是月夏主諒祚卒子秉常
立是歲遼遣使來弔祭及賀卽位其賀生辰正日自是
歲交遣使如故事

熙寧元年春正月甲戌朔日有食之丙申趙槩罷知徐

州以唐介參知政事三月丙戌詔恤刑夏四月乙巳詔翰林學士王安石越次入對六月辛亥詔諸路興水利乙亥河決棗彊埽丙寅命翰林學士司馬光御史中丞滕甫裁定國用秋七月癸酉立謀殺減等令語在刑法志已卯以陳升之知樞密院事壬午以恩冀州河決振被溺家八月甲子詔曰昔我藝祖皇帝之興以天發之期兵未始一血刃而卒再造區夏其大謀盛烈被諸萬世而莫高焉朕奉承聖緒夙夜不敢康乃顧後之子孫寢微弗顯而有司未嘗議封爵之文豈朕所以尊大統推親親之意哉且積厚者其流遠施大者其報豐宜令

中書門下考太宗之籍以屬近而行尊者一人裂土地而王之使常從獻于郊廟世世勿復絕九月辛未以太祖曾孫從式封安定郡王冬十月乙卯出奉宸庫珠玉千三百四十萬付河北以備買馬戊辰禁銷金服飾十一月丁亥祀天地于圜丘大赦十二月庚申詔判汝州富弼爲集禧觀使乘驛赴闕辛酉邵亢罷知越州是歲京師瀛莫州地大震河東饑振之于闕來貢

二年春二月巳亥以富弼同中書門下平章事庚子以王安石參知政事甲子陳升之王安石創置三司條例議行新法是月封秉常爲夏國主三月戊子秉常上誓

表納塞門安遠二砦乞綏州許之夏四月丁未參知政
事唐介卒丁巳遣使諸路察農田水利賦役五月癸未
翰林學士鄭獬罷知杭州宣徽北院使王拱辰罷判應
天府知制誥錢公輔罷知江寧府並以沮新法故六月
戊申詔修二股河丁巳御史中丞呂誨以論王安石罷
知鄧州秋七月乙丑朔日當食雲陰不見辛巳立淮浙
江湖六路均輸法壬午詔振恤被水州軍八月癸卯侍
御史劉琦貶監處州鹽酒務御史裏行錢頴貶監衡州
鹽稅乙巳殿中侍御史孫昌齡貶通判蘄州丙午同修
起居注范純仁罷同知諫院明日出知河中府並以論

王安石新法故辛酉以程顥王子韶並為太子中允權
監察御史裏行壬戌侍御史知雜事劉述同判刑部丁
諷坐受刑名敕不卽下述貶知江州諷貶通判復州審
刑院詳議官王師元坐言許遵議刑名不當貶監安州
稅九月丁卯立青苗法戊辰出內庫緡錢百萬糴河北
常平粟壬辰以呂惠卿為太子中允崇政殿說書冬十
月丙申富弼罷判亳州以陳升之同中書門下平章事
是月以夏人渝初盟乃城綏州不易二砦改名綏德城
十一月乙丑命樞密副使韓絳制置三司條例甲戌詔
釐改皇族授官法丙子頒農田水利約束閏月壬子置

太子務是月遣官提舉諸路常平廣惠倉兼管均農田水利差役事十二月丙戌增二京留司御史臺國子監及宮觀官是歲古勿峒首領曩知會歸順交趾來貢三年春二月壬申以司馬光爲樞密副使固辭不拜乙酉韓琦請罷河北安撫使止領大名府路從之三月己亥始策進士罷詩賦論丙辰立試刑法及詳刑官右正言孫覺以沮青苗貶知廣德軍夏四月戊辰御史中丞呂公著以沮青苗貶知潁州己卯趙抃罷知杭州以韓絳參知政事是月監察御史裏行程顥張戢王子韶右正言李常侍御史知雜事陳襄坐忤王安石相繼罷以

前秀州軍事判官李定爲太子中允監察御史裏行五月甲辰詔罷制置三司條例歸中書六月丙戌知諫院胡宗愈貶通判真州秋七月壬辰呂公弼罷知太原府以馮京爲樞密副使八月己卯夏人犯大順城其後屢入寇九月己亥始試法官庚子曾公亮罷爲集禧觀使辛丑以馮京參知政事吳充爲樞密副使癸丑司馬光罷知東興軍冬十月戊寅同平章事陳升之母喪去位十二月己未立諸路更戍法乙丑立保甲法丁卯以韓絳王安石並同中書門下平章事王珪參知政事戊寅初行免役法是歲翰林學士范鎮以忤王安石致仕直

史館蘇軾罷通判杭州廣源下溪州蠻內附交趾來貢
 河北陝西旱饑振之
 四年春正月己丑知青澗城种諤襲夏兵于囉兀北敗
 之遂城囉兀二月丁巳朔罷詩賦及明經諸科以經義
 論策試進士壬申進封弟頽為嘉王三月丁亥夏人陷
 撫寧堡丙午貶种諤潭州安置丁未韓絳坐失律罷知
 鄧州夏四月癸酉司馬光權判西京留臺种諤再貶賀
 州別駕六月甲戌判亳州富弼坐格青苗徙汝州秋七
 月丁酉監察御史裏行劉摯罷監衡州鹽倉御史中丞
 楊繪貶知鄭州八月癸酉置洮河安撫司命王韶主之

九月丙戌河決鄆州辛卯大饗明堂以英宗配赦天下
 庚子夏人來貢冬十月壬子朔行募役法立選人及任
 子出官試法戊辰立太學生內外上舍法是歲層檀高
 麗來貢渝州夷賊李光吉叛討平之河北饑兩浙水振
 之
 五年春正月己亥置京城邏卒察謗議時政者二月丙
 寅以蔡挺為樞密使三月丙午置市易務夏四月庚戌
 朔立殿前馬步軍春秋校試殿最法辛未塞北京決河
 五月辛巳以古渭砦為安遠軍命王韶兼知軍詔宗室
 非祖免親許應舉丙午行保甲法六月乙亥置武學秋

七月閏庚戌遣中書檢正官章惇察訪荆湖北路八月甲申秦鳳路沿邊安撫使王韶復武勝軍遂改爲鎮洮軍乙未詔待從及諸路監司各舉有才行者一人甲辰頒方田均稅法是月前參知政事歐陽脩卒詔求脩所撰五代史九月丙寅少華山崩冬十一月壬申章惇開梅山置安化縣十二月壬午以陳升之爲樞密使是歲龜茲來貢

六年春正月辛亥復禧祖爲太廟始祖祧順祖于夾室二月丙申王韶復河州獲木征妻子三月庚戌置經義局命王安石提舉丁卯詔進士諸科並試明法注官庚

午封李日尊子乾德爲交趾郡王夏四月甲戌朔日當食雲陰不見乙亥置律學己亥文彥博罷判河陽五月乙丑遣中書檢正官熊本措置瀘夷秋八月戊戌復比閩族黨法九月壬寅置兩浙和糴倉立斂散法戊申詔興水利戊午岷州首領木令征以城降王韶入岷州冬十月辛未章惇平懿洽州蠻辛巳以復熙河洮岷疊宕等州御紫宸殿受羣臣賀解所服玉帶賜王安石壬辰行折二錢是歲收免行錢開直河振兩浙江淮饑陀婆離大食交趾西南龍蕃來貢

七年春正月甲子熊本平瀘夷二月乙未知河州景思

立等與青宜結鬼章戰于踏白城敗死廢遼州三月壬寅木征鬼章寇岷州丙辰遼遣蕭禧來言河東疆界已未行方田法是月大旱監安上門鄭俠上流民圖夏四月癸酉罷新法是日雨明日以呂惠卿鄧綰言下鄭俠獄復行新法惟方田斲罷乙酉王韶進築珂諾城連敗木征降之丙戌王安石罷知江寧府以韓絳同中書門下平章事呂惠卿參知政事五月辛亥罷賢良方正等科乙丑大雨水壞陝平陸二縣六月丁亥作渾儀浮漏以木征為榮州團練使賜姓趙名至忠秋九月壬子三司火癸丑置京畿河北京東西路三十七將冬十月壬

申詔前宰相韓琦富弼文彥博曾公亮條代北事宜以聞庚辰置三司會計司以韓絳提舉十一月己未祀天地于圜丘大赦十二月丁卯以王韶為樞密副使是歲于闐高麗來貢武都諸夷內附河北饑振之八年春正月庚子蔡挺罷判留司御史臺馮京罷知亳州乙卯雨木冰二月癸酉復以王安石同中書門下平章事戊寅詔以李靖營陣法教殿前馬步軍乙酉初行河北戶馬法三月庚子遼遣蕭禧再來遣韓縝往河東會議癸丑遣沈括如遼報聘戊午太白晝見夏四月戊寅以吳充為樞密使閏月乙未陳升之罷判揚州壬寅

宋史新編卷五
沈括上奉元曆五月丁丑雨土及黃毛六月巳酉頒王
安石詩書周禮義于學官秋七月戊寅太白晝見戊子
命鹽鐵副使韓縝如河東割地以畀遼八月庚寅朔日
當食雲陰不見庚戌韓絳罷知許州丁巳大閱九月庚
申朔立武舉絕倫法冬十月庚寅呂惠卿罷知陳州乙
未葦出軫巳亥詔求直言壬寅赦天下罷手實法丁未
葦滅十一月交趾大舉入寇陷欽州廉州十二月壬寅
以元絳參知政事曾孝寬簽書樞密院事辛亥命天章
閣待制趙卨為安南道招討使內侍嘉州防禦使李憲
副之以討交趾是歲鄜延環慶及常潤州饑竝振之

九年春正月乙丑雨木冰戊辰交趾陷邕州知州蘇緘
死之巳卯章惇招降五溪蠻遂城下溪州改名會溪二
月戊子以宣徽南院使郭達為安南道招討使罷李憲
以趙卨副之詔占城占臘合擊交趾巳丑宗哥首領鬼
章寇五牟谷二月庚辰以种諤知岷州夏四月辛亥茂
州夷寇邊遣內押班王中正經制五月丁卯城茂州秋
八月巳丑罷鬻祠廟錢冬十月丙午王安石罷知江寧
府以吳充王珪竝同中書門下平章事馮京知樞密院
事十二月癸卯安南招討使郭達敗交趾兵於富良江
獲其偽太子洪真李乾德奉表詣軍門降遂班師是歲

宋史新編卷五
朱崖軍黎賊入寇詔討之大理占城來貢
十年春二月丁酉詔諸州歲以十一月給老疾貧乏者粟盡三月乃止巳亥王韶罷知洪州丙午以廣源州為順州秋七月乙亥郭達以安南失律貶左衛將軍丙子河決澶州曹村埽八月甲辰詔侍從臺諫監司各舉文臣有才行者一人冬十一月庚午以西蕃邈川首領董鑑都首領青宜結鬼章為廓州刺史阿令骨為松州刺史甲戌祀天地于園丘大赦十二月壬子詔改明年元丁亥子傭封均國公是歲占城注輦來貢

元豐元年春正月壬辰以孫固同知樞密院事巳亥簽

書樞密曾孝寬父喪去位三月癸未詔内外文武官各舉堪應武舉一人夏四月戊辰塞曹村決河名其埽曰靈平六月癸卯朔日有食之秋七月癸酉朔命西上閣門使韓存寶經制瀘州納溪夷九月乙酉以呂公著薛向並同知樞密院事冬十一月癸巳辰州徭賊叛詔討之十二月戊午置大理獄是歲詔詳定郊廟及朝會禮儀交陞于闐來貢河北諸州水武康軍及梁縣嘉禾生河中府及夔州甘露降終神宗世甘露降凡二十二年春正月甲午詔以十哲從祀孔子二月甲寅日中有黑子自熙寧十年至此凡四見乙卯瀘州夷乞弟犯

宋史新編卷五
邊詔討之庚寅疏汴洛夏五月庚辰詔曰濮安懿王先
帝斟酌典禮卽園立廟詔王子孫歲時奉祀義協恩稱
後世無得議焉今王夫人名位或未正瑩域或異處有
司置而不講曷足以彰明先帝甚盛之德仰承在天之
志乎三夫人可竝稱曰王夫人命有司擇歲月遷祔濮
園俾其子孫以時奉主與主合食而致孝思焉甲申元
絳罷知亳州戊子以蔡確參知政事六月甲寅清汴成
冬十月癸卯置籍田令詔立水居戶賦役法乙卯太皇
太后曹氏崩是歲復詳定郊廟及朝會禮儀知湖州蘇
軾貶黃州團練使西南諸蕃來貢

三年春二月丙午以章惇參知政事三月乙丑吳充罷
爲西太一宮使癸酉葬慈聖光獻曹皇后于永昭陵夏
四月庚申詔御史臺六察以糾劾多寡爲殿最五月甲
申復命韓存寶經制瀘夷是月詔致仕翰林學士范鎮
祕書監劉几等同議大樂六月丙午詔中書詳定官制
秋七月庚午河決澶州癸未彗出太微垣丙戌避殿減
膳求直言九月乙亥正官名辛巳大饗明堂罷羣神從
祀以英宗配帝赦天下是月以薛向孫固竝爲樞密副
使親王顥頽竝進封前宰相王安石等悉進秩以馮京
爲樞密使已而薛向罷知潁州以呂公著爲樞密副使

冬十一月己丑朔日當食雲陰不見是歲高麗于闐南丹州來貢
四年春正月乙未命步軍都虞候林廣代韓存寶經制瀘夷庚子詔試進士加律義辛亥馮京罷知河陽以孫固知樞密院事呂公著韓縝同知樞密院事三月癸卯章惇罷知蔡州甲辰以張璪參知政事戊申大閱夏四月己巳詔罷南郊合祭天地之西河決澶州小吳埽五月戊申封晉程嬰為成信侯公孫杵臼為忠智侯立廟絳州六月河北諸路蝗秋七月庚寅以夏人囚其主乘常詔五路會兵討之甲辰韓存寶坐逗遛無功伏誅已

西詔議選格內外官司舉官悉罷八月丁丑熙河經制李憲敗夏人于西市新城遂復蘭州九月辛亥鄜延經略副使种諤又敗夏人于無定川遂克米脂城冬十月庚午環慶經略使高遵裕復通遠軍十一月癸未朔日有食之癸卯种諤至夏州索家平兵眾三萬人以無食而潰丙午高遵裕師還夏人來追亦潰十二月辛未林廣破乞弟于納江是歲拂菻于闐董氊來貢

五年春正月庚子貶高遵裕郢州團練副使本州安置乙巳作新渾儀浮漏辛亥詔再議西討以李憲為涇原熙河蘭會安撫制置使李浩權安撫副使三月壬寅鄜

延副總管曲珍敗夏人于金湯夏四月壬子朔日當食不見癸酉官制成以王珪爲尚書左僕射兼門下侍郎蔡確爲尚書右僕射兼中書侍郎章惇爲門下侍郎張璪爲中書侍郎蒲宗孟爲尚書左丞王安禮爲尚書右丞丁丑呂公著罷知定州五月戊戌詔兩省官舉可任御史者各二人甲辰遣給事中徐禧治鄜延邊事六月辛亥環慶經略司遣將與夏人戰破之戊寅曲珍等敗夏人于明堂川秋七月庚子以蔡京爲起居郎同詳定官制八月壬子子傭進封延安郡王庚申詔歲以四孟月朝獻景靈宮辛未种諤以行軍迂道降文州刺史甲

戌城永樂九月丁亥夏人三十萬衆寇永樂曲珍戰不利裨將寇偉等死之夏人遂圍城戊戌城陷給事中徐禧等死之庚子安化蠻寇宜州知州王奇死之冬十月甲寅知延州沈括坐措置乖方責授均州團練副使隨州安置鄜延總管曲珍坐城陷敗走降授皇城使癸酉貶知太原府呂惠卿知單州是歲渤泥交阯西南龍蕃來貢

六年春正月丁丑朔御大慶殿始用新樂丙午封楚屈平爲忠潔侯二月丁未夏人攻蘭州丙辰貶經略使李憲爲經略安撫都總管夏五月甲午夏人寇蘭州右侍

宋史新編卷五
禁革定死之癸卯賜資州孝子支漸粟帛閏六月乙亥朔夏主秉常請修貢許之丙戌汴水溢秋七月丙辰孫固罷知河陽以韓縝知樞密院事安燾同知樞密院事八月辛卯蒲宗孟罷知汝州王安禮爲尚書左丞李清臣爲尚書右丞九月癸卯朔日有食之冬十月癸酉朔夏主秉常請修貢乞還舊疆戊子封孟軻爲鄒國公辛丑封馬援爲忠顯王十一月丙午祀昊天上帝于圜丘罷合祭赦天下是歲層壇于闐來貢

七年春正月癸丑夏人寇蘭州三月癸亥白虹貫日夏四月癸巳夏人寇延州五月辛酉白虹貫日壬戌以孟軻配食文宣王封荀况揚雄韓愈爲伯並從祀六月丙子夏人寇德順軍巡檢王友死之秋七月甲寅王安禮罷知江寧府冬十月乙亥夏人寇熙河十一月丁酉朔夏人寇靜邊砦隊將白玉李貫死之甲辰夏國主秉常復遣使來貢十二月戊辰端明殿學士司馬光上資治通鑑是歲河東饑河北水伊洛溢河決元城並振之大食三佛齊西南龍蕃來貢

八年春正月戊戌帝不豫三月甲午朔立延安郡王傭爲皇太子賜名煦皇太后權同處分軍國事乙未赦天下戊戌帝崩在位十九年年三十八九月哲宗上尊諡

曰英文烈武聖孝皇帝、廟號神宗、紹聖二年、加謚、曰紹
天法古運德建功英文烈武欽仁聖孝、崇寧三年、更謚
曰體元顯道帝、德王功英文烈武欽仁聖孝、政和二年、
加今謚、

論曰、人主負高世之資者、恒患於喜功、人臣售遇主之
術者、多失於自用、茲二者、常相因為害、可勝道哉、宋自
開國百餘年、寓內又安、神宗乃以不克復幽燕為病、夙
夜勵精、欲雪數世之恥、為前人所不能為、於是在廷忠
鯁之臣、斥逐以盡、惟任一合意之王安石、援引邪佞、悉
更祖宗成法、經營所謂富強者、既而民怨日叢、外患日

熾、帝至中夜不寐、遶榻行、悔何及矣、安石既死、其說猶
行於紹聖、崇寧、政和間、靖康之禍、誰實基之、書曰、邦之
杌隍、曰由一人、其神宗任安石之謂耶、

宋史新編卷五

宋史新編卷五
本紀六
明南京戶部主事莆田柯維騏編

宋史新編卷六

本紀六

哲宗

明南京戶部主事莆田柯維騏編

哲宗、憲元繼道世德揚功欽文睿武齊聖昭孝皇帝、諱
煦、神宗第六子也。母德妃朱氏。是為欽成皇后。熙寧九
年十二月七日生。帝于宮中。初名傭。授檢校太尉。天平
軍節度使。封均國公。元豐五年進開府儀同三司。彰武
軍節度使。封延安郡王。八年春二月。神宗寢疾。宰相王
珪等請早建儲。又請皇太后權同聽政。神宗首肯。三月
甲午朔。皇太后垂簾福寧殿。諭珪等曰：「皇子自皇帝服

藥手寫佛書爲帝祈福因出以示珪等字極端謹珪等稱賀遂奉制立爲皇太子戊戌神宗崩帝卽位己亥大赦天下羣臣進秩諸軍賜賚有差庚子尊皇太后曰太皇太后皇后曰皇太后德妃朱氏曰皇太妃甲寅同太皇太后聽政庚申宰臣王珪已下悉進秩封叔顥爲揚王顥爲荆王弟佖似侯似及宗室進封有差辛酉詔顏子孟子配享孔子廟庭夏四月甲戌詔曰先皇帝臨御十有九年建立政事以澤天下而有司奉行失當幾於煩擾或苟且文具不能宣布實惠其申諭中外協心奉命以稱先帝惠安元元之意乙亥詔以太皇太后生日

七月十六日爲坤成節五月丁酉避僖祖忌辰以帝生日次日爲興龍節庚戌左僕射王珪卒戊午以蔡確爲尚書左僕射兼門下侍郎韓縝右僕射兼中書侍郎章惇知樞密院事司馬光爲門下侍郎六月庚午賜孝子徐積粟帛丁亥詔中外臣庶直言朝政闕失民間疾苦秋七月戊戌以呂公著爲尚書左丞詔府界三路保甲罷團教丙辰罷沅州增修堡砦冬十月丁丑詔待從各舉諫官二人罷義倉乙酉葬神宗于永裕陵丙戌罷方田十二月壬戌開經筵甲戌罷後苑西作院戊寅罷增直鑄錢監是歲夏國高麗于闐大食來貢遼遣使來弔

宋史紀事本末卷之六
祭及賀卽位其賀生辰正且自是歲交遣使如故事
元祐元年春正月戊午甘露降迄元符甘露降凡二十
二月丁卯詔侍從各舉堪任監司者二人閏月庚寅蔡
確罷知陳州以司馬光爲尚書左僕射兼門下侍郎詔
韓維孫永呂大防范純仁詳定役法壬辰以呂公著爲
門下侍郎丙午以李清臣爲尚書左丞呂大防爲尚書
右丞辛亥章惇罷知汝州甲寅詔侍從各舉經明行修
可爲學官者二人乙卯以范純仁同知樞密院事丙辰
罷諸州常平管勾官三月辛未置訴理所許熙寧以來
得罪者自言乙亥罷熙河蘭會路經制財用司辛巳以

程頤爲崇政殿說書夏四月己丑韓縝罷知潁昌府辛
卯詔河北諸路旱災蠲其租辛丑詔大臣各舉可充館
閣者三人壬寅以呂公著爲尚書右僕射兼中書侍郎
詔起致仕太師文彥博平章軍國重事乙巳詔戶部裁
冗費丙侍李憲王中正宋用臣石得一有罪貶五月丁
巳朔以韓維爲門下侍郎壬戌詔侍從臺官監司各舉
縣令一人戊辰命程頤同修國子監條制壬午詔太師
文彥博班宰相之上六月甲辰置春秋博士貶呂惠卿
建州安置甲寅詔正風俗脩紀綱勿理隱疵細故秋七
月辛酉設十科舉士法乙丑夏主秉常卒子乾順立八

月辛卯罷青苗法九月丙辰朔左僕射司馬光卒辛酉
大饗明堂以神宗配赦天下丁卯以蘇軾為翰林學士
知制誥已卯張璪罷知鄭州冬十一月戊午以呂大防
為中書侍郎劉摯為尚書右丞是歲占城于闐來貢
二年春正月乙丑封乾順為夏國主戊辰詔舉人程試
主司毋得於老莊列子書命題二月丁亥詔施黔戎瀘
等州保甲監司免歲閱三月戊辰詔御史臺察民俗奢
僭者夏四月丁亥鬼章子結吼齷寇洮東已丑詔太師
文彥博十日一議事都堂辛卯詔冬夏旱暵海內被災
者廣避殿減膳責躬思過以圖消弭癸卯雨乙丑以布

衣陳師道為亳州司戶參軍丁未復制科戊申李清臣
罷知河陽五月癸丑夏人圍南川砦丁卯以劉摯為尚
書左丞王存為尚書右丞六月辛丑以安燾知樞密院
事秋七月庚戌朔日有食之陰雨不見辛亥夏人寇鎮
戎軍庚申進封李乾德為南平王辛未韓維罷知鄧州
八月辛巳程頤罷經筵丁未岷州將種誼復洮州執鬼
章青宜結冬十二月壬寅頒元祐赦令式是冬始閉汴
口是歲交阯于闐西南諸蕃來貢
三年春正月庚戌復廣惠倉庚申雪寒發京西穀五十
餘萬石損其直以紓民壬戌罷上元遊幸二月乙亥夏

人寇德靜若夏四月辛巳以呂公著爲司空同平章軍
國事呂大防爲尚書左僕射兼門下侍郎范純仁爲尚
書右僕射兼中書侍郎壬午以孫固爲門下侍郎劉摯
爲中書侍郎王存爲尚書左丞胡宗愈爲尚書右丞趙
瞻簽書樞密院事秋七月戊申荆王頽卒冬十月丙戌
詔罷新創諸堡砦廢渠陽軍閏十二月甲辰范鎮定鑄
律度諸樂器以進令禮官太常參定賜鎮詔曰朕惟春
秋之後禮樂先亡秦漢以來詔武僅在散樂工於河海
之上往而不還聘先生於齊魯之間有莫能致魏晉以
下曹檜無譏豈徒鄭衛之音已雜華戎之器間有作者

猶存典刑然銖黍之一差或宮商之易位惟我四朝之
老獨知五降之非審聲知音以律生尺覽詩書之來上
閱箕虞之在廷君臣同觀父老太息方詔學士大夫論
其法工師有司考其聲上追先帝移風易俗之心下慰
老臣愛君憂國之志究觀所作嘉歎不忘是歲大食麻
囉拔于闐三佛齊西南蕃阿里骨來貢

四年春二月甲辰司空呂公著卒三月己卯作渾天儀
胡宗愈罷知陳州夏四月戊午立試進士四場法罷明
法科五月蔡確連貶新州安置六月甲辰范純仁罷知
潁昌府王存罷知蔡州丙午以趙瞻同知樞密院事韓

忠彥爲尚書左丞許將爲尚書右丞秋七月乙亥知樞密院安燾母喪去位八月壬寅敕郡守貳以四善三最課縣令吏部歲上監司考察知州狀九月辛巳大饗明堂赦天下冬十一月癸未以孫固知樞密院事劉摯爲門下侍郎傅堯俞爲中書侍郎十二月癸丑更定朝儀樂舞戊午以御史闕令中丞兩省各舉二人是歲夏人復通好詔邊將毋生事邈黎大食麻囉拔來貢

五年春二月己亥夏人來歸求樂所掠吏士百四十九人詔以四砦畀之庚戌太師文彥博致仕三月丙寅朔知樞密院趙瞻卒壬申以韓忠彥同知樞密院事蘇頌

爲尚書左丞夏四月丙午知樞密院孫固卒秋七月乙酉夏人來議分畫疆界冬十月癸巳罷提舉修河司十二月辛卯朔許將罷知定州是歲京東旱浙西水高麗于闐三佛齊龍蕃阿里骨來貢

六年春二月辛卯以劉摯爲尚書右僕射兼中書侍郎王巖叟簽書樞密院事癸巳以蘇轍爲尚書右丞夏四月辛丑夏人寇熙河蘭岷廊延路五月己未朔日有食之秋八月己丑三省進納后六禮儀制九月丁亥夏人寇麟府二州丁酉出內庫緡錢五十萬備邊費冬十月庚午幸國子監賜祭酒豐稷三品服監學官賜帛有差

十一月乙酉劉摯罷知鄆州辛丑中書侍郎傅堯愈卒是歲作觀天曆兩浙水交阯高麗三佛齊拂菻來貢七年夏四月己未立孟氏爲皇后五月丙午王巖叟罷知鄆州六月辛酉以蘇頌爲尚書右僕射兼中書侍郎韓忠彥知樞密院事蘇轍爲門下侍郎范百祿爲中書侍郎梁燾爲尚書左丞鄭雍爲尚書右丞劉奉世簽書樞密院事戊辰渾天儀像成秋七月庚戌宗室總麻以上禁析居冬十月庚戌朔環州地震丁卯夏人寇環州十一月癸巳合祭天地于圜丘赦天下是歲于闐高麗占城西南蕃龍氏羅氏來貢

八年春三月甲申蘇頌罷爲集禧觀使辛卯范百祿罷知河中府庚子詔御試舉人復試詩賦論三題夏四月丁未朔夏人來謝罪請以蘭州易塞門砦不許丁巳詔曰朕聞五帝不相沿樂三王不相襲禮世有損益因時制宜惟我祖宗嚴奉郊廟當遣官攝事皆考合於前文唯奠玉親祠自裁成於大禮每以三歲對越二儀咸秩百神大賚四海迄先帝元豐之末講方丘特祭之儀蓋將補一代之闕容振百王之墜典朕惟菲德嗣守丕基列聖已行謹當遵奉先朝未舉懼不克堪是以昔歲仲冬竭誠大祀神祇饗答祖考燕寧前詔有司載加集議

猶欲咨度諸儒之論稽參六藝之文然理既不疑則事無可議斷自朕志協于僉言祇率舊章永爲成式今後南郊合祭天地依元祐七年例施行仍罷禮部集官詳議六月戊午梁燾罷爲醴泉觀使秋七月丙子朔以范純仁爲右僕射兼中書侍郎九月戊寅太皇太后高氏崩冬十月庚午復內侍劉瑗等六人十一月乙未以雪寒振京城民饑十二月甲寅倣唐六典脩官制是冬以禮部侍郎楊畏言復章惇呂惠卿官是歲京東西河南北淮南水民流振之

紹聖元年春二月丁未以李清臣爲中書侍郎鄧潤甫

爲尚書左丞己酉葬宣仁聖烈高皇后于永厚陵三月壬申朔日有食之乙亥呂大防罷知穎昌府丁酉蘇轍罷知汝州夏四月壬子知定州蘇軾坐前掌制命語涉譏訕貶知英州癸丑改元白虹貫日甲寅追復蔡確官壬戌以章惇爲尚書左僕射兼門下侍郎范純仁罷知穎昌府丁卯詔復元豐免役法戊辰同修國史蔡卞請重修神宗實錄閏月壬申復提舉常平官癸酉罷十科舉士法甲申以安燾爲門下侍郎丙戌復義倉五月甲辰罷進士習試詩賦令專一經置宏詞科辛亥劉奉世罷知成德軍癸丑編類元祐羣臣章疏及更改事條乙

丑尚書左丞鄧潤甫卒六月甲戌侍御史來之邵等疏
蘇軾詆斥先朝罪再謫惠州癸未以曾布同知樞密院
事甲申除進士引用王安石字說之禁秋七月丁巳以
御史黃履周秩諫官張商英言追奪前宰執司馬光呂
公著王巖叟贈諡貶前宰執呂大防爲祕書監劉摯爲
光祿卿蘇轍爲少府監並分司南京梁燾守外祠戊午
詔大臣朋黨司馬光以下各輕重議罰布告天下九月
庚戌罷制科罷廣惠倉冬十二月甲午范祖禹趙彥若
黃庭堅坐神宗實錄失當貶求豐黔州安置是歲京師
疫洛水溢太原地震河北水振之夏國三佛齊西南蕃

阿里骨來貢

二年春二月乙亥呂大防坐史事貶安州居住辛巳出
內庫錢帛二十萬助河北振饑夏四月壬申詔吏部尚
書許將等各舉才行可備任使者二人丁亥詔依元豐
置律學博士秋七月丙辰詔大理寺復置右治獄仍依
元豐增官屬九月辛亥大饗明堂赦天下冬十月甲子
鄭雍罷知陳州甲戌以許將爲尚書左丞蔡卞爲尚書
右丞辛巳進封顯爲楚王十一月乙未安燾罷知河南
府是歲交趾三佛齊阿里骨來貢

三年春正月庚子韓忠彥罷知真定府二月辛未復元

豐恤孤幼命三月壬辰以禁中屢火罷春宴及幸池苑
丁酉尚書省火辛亥進封必為申王佶為端王秋八月
庚辰以范祖禹劉安世在元祐中構造誣謗責授祖禹
昭州別駕賀州安置安世新州別駕英州安置九月壬
子楚王顥卒乙卯廢皇后孟氏冬十二月甲戌翰林學
士蔡京上新修太學敕令式是歲夏人屢入寇于闐大
食龜茲西南蕃龍氏羅氏來貢

四年春正月庚戌李清臣罷知河南府二月己未以三
省言追貶呂八著為建武軍節度副使司馬光清遠軍
節度副使王巖叟雷州別駕奪趙瞻傅堯俞贈諡追韓

維到任及孫固范百祿胡宗愈遺表恩己卯復元豐權
茶法庚辰罷春秋科癸未以三省言貶劉奉世及韓維
以下三十人官再貶呂大防為舒州團練使劉摯鼎州
團練副使蘇轍化州別駕梁壽雷州別駕范純仁武安
軍節度副使安置于循新雷化末五州大防摯壽竟卒
貶所甲申降文彥博為太子少保閏月壬寅以曾布知
樞密院事許將為中書侍郎蔡卞為尚書左丞黃履為
尚書右丞林希同知樞密院事甲辰再貶蘇軾移昌化
軍安置范祖禹移賓州安置劉安世移高州安置三月
壬戌夏人犯麟州庚午夏人大至葭蘆城下知石州張

構等擊走之壬午命官編類司馬光等改廢法度論奏
事狀夏四月甲辰知渭州章棗城平夏丁未追貶王珪
為萬安司戶叅軍五月丁丑貶韓維為崇信軍節度副
使六月癸未朔日有食之秋八月己酉彗出西方九月
壬午詔求直言乙卯赦天下冬十一月癸酉貶劉奉世
柳州安置丁丑詔放歸田里程頤涪州編管是歲于闐
西南羅蕃來貢播州夷楊光榮等內附兩浙饑振之
元符元年春正月丙寅得秦璽于咸陽三月甲戌進封
侯為莘王似為簡王偲為永寧郡王夏四月壬辰林希
罷知亳州六月戊寅朔改元秋七月庚午再貶范祖禹


移化州安置劉安世梅州安置祖禹尋卒詔王巖叟朱
光庭諸子並勒停不敘是時文彥博子及甫亦陷于獄
因錮劉摯梁燾子孫于嶺南八月丁亥詔大臣各舉所
知仍指言所堪職任九月庚戌前國史院編修秦觀再
貶雷州編管冬十月己亥夏人寇平夏城十一月甲子
祀昊天上帝于圜丘罷合祭赦天下是歲西蕃首領李
訛哆等內附高麗瞎征西南諸蕃來貢澶州河溢振恤
河北京東被水者
二年春二月甲申夏人遣使謝罪却不納三月丙辰遼
遣使為夏人請緩師夏四月癸巳進封偲為睦王五月

癸亥建西安州及天都等砦是月河決內黃口東流斷絕秋七月丙寅洮西安撫使王贍復邈川城西蕃首領以城降八月癸酉宰臣章惇等進新修敕令式惇讀於帝前其間有元豐所無而用元祐者帝曰元祐亦有可取乎惇等對曰取其善者甲戌詔大河水勢北流其以河事付轉運司貴州縣併力救護隄岸語在河渠志癸未歲星晝見丁亥修復會州癸巳瞎征降九月庚子夏人遣使謝罪請和丁未立賢妃劉氏爲皇后己未青唐酋隴拶以城降甲子右正言鄒浩論劉氏貶新州羈管閏月癸酉以青唐爲鄯州隴右節度邈川爲湟州宗哥

城爲龍支城俱隸隴右戊寅以廓州爲寧砦城辛巳黃履罷知亳州冬十一月乙未詔諸州學行三舍法是年蔡卞章惇議置着詳訴理局由是士大夫重得罪者八百餘家

三年春正月辛未帝有疾不視朝己卯帝崩在位十六年年二十五帝無子皇太后乃立徽宗七月徽宗上尊諡曰欽文睿武昭孝皇帝廟號哲宗崇寧三年加諡曰憲元繼道顯德定功欽文睿武齊聖昭孝政和二年改今諡

論曰哲宗幼冲踐阼政出宣仁倚任元老彙征衆賢悉



廢王安石所興為以復祖宗之舊當是時海內元元歡
若更生遼人亦以生事為戒封徼罷警蓋庶幾慶曆嘉
祐之隆矣及帝親政乃惑於熙豐姦黨假紹述以報復
由是仁賢受禍國事日非馴致靖康之難夫審於忠邪
則哲察於理亂則哲帝烏足以語此

宋史新編卷六

天保三

